

Tarikh Dibaca: 16 DIS 2022M / 21 Jumadal Ula 1444H



ISLAMIC • SAVIOUR • OBEDIENCE

KHUTBAH JUMAAT

Tajuk:

***“ZAKAT MENYELAMATKAN DIRI DAN
HARTA”***

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR



“ZAKAT MENYELAMATKAN DIRI DAN HARTA”

الْحَمْدُ لِلَّهِ الْقَائِلِ: إِنَّ الَّذِينَ ءَامَنُوا وَعَمِلُوا الصَّالِحَاتِ وَأَقَامُوا الصَّلَاةَ وَءَاتَوْا الزَّكَاةَ لَهُمْ أَجْرُهُمْ عِنْدَ رَبِّهِمْ وَلَا خَوْفٌ عَلَيْهِمْ وَلَا هُمْ يَحْزَنُونَ ﴿٢٧٧﴾¹

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ! أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى:

يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ ﴿١٠٢﴾²

Muslimin yang dirahmati Allah sekalian,

Marilah kita bersama-sama meningkatkan ketakwaan kita kepada Allah SWT, dengan mematuhi segala suruhan-Nya dan meninggalkan segala larangan-Nya. Semoga kita diberikan kejayaan di dunia dan di akhirat.

¹ al-Baqarah : 277.

² Ali-Imran : 102.



Tajuk khutbah pada hari ini ialah **"ZAKAT MENYELAMATKAN DIRI DAN HARTA."**

Hadirin muslimin yang berbahagia,

Syariat zakat yang diwahyukan Allah SWT kepada kita hakikatnya mempunyai hikmah yang sangat besar, iaitu menjamin keselamatan bagi kita di dunia dan akhirat, sebagaimana firman Allah SWT dalam surah al-Baqarah ayat 277 yang dibacakan di awal khutbah tadi yang bermaksud:

"Sesungguhnya orang-orang yang beriman, mengerjakan amal soleh, mendirikan sembahyang dan menunaikan zakat, mereka mendapat pahala di sisi Tuhannya. Tidak ada kekhawatiran terhadap mereka dan tidak (pula) mereka bersedih hati."

Inilah yang akan diperolehi bagi mereka yang menunaikan zakat, iaitu rasa selamat dan dijauhkan daripada rasa bimbang atas kehidupan di dunia dan juga di akhirat.

Muslimin yang dirahmati Allah,

Selalunya orang yang berharta akan sentiasa memikirkan agar harta kekayaannya selamat. Memang sesuatu yang lojik, setelah penat mencari kekayaan, sudah pastilah kita sangat sayang kepadanya dan mahu agar ia selamat. Sudah pasti kita tidak mahu harta itu dicuri atau dirompak. Kita juga tidak mahu ia musnah terbakar, dihanyutkan banjir atau hilang ditelan bumi kerana tsunami atau tanah runtuh. Kita juga tidak reda harta itu binasa akibat ditipu oleh *scammer* sehingga mengalami kerugian puluhan malahan ratusan ribu ringgit.

Dalam hal inilah, Islam telah memberikan jalan keluarnya sejak sekian lama menerusi ibadah zakat. Ini kerana, berpandukan beberapa



hadis Nabi Muhammad SAW, jelas sekali bahawa ibadah sedekah dan zakat adalah ibarat 'pagar halimunan' yang sangat ampuh untuk menyelamatkan kekayaan kita daripada binasa atau dibinasakan.

Hadis daripada Abdullah bin Mas'ud Radiallahuanhu bahawa Nabi Muhammad SAW bersabda:

حَصِّنُوا أَمْوَالَكُمْ بِالزَّكَاةِ

"Lindungilah harta kamu dengan zakat."

(Riwayat al-Tabarani).

Inilah janji nabi kepada mereka yang menunaikan zakat, iaitu dipelihara Allah SWT hartanya daripada kebinasaan.

Muslimin sekalian,

Mutakhir ini juga ramai orang merasa sangat bimbang dengan kehidupan. Disebabkan ekonomi dunia yang tidak stabil, terdapat kes orang-orang kaya dan masyhur yang menjadi miskin, hingga akhirnya menjadi asnaf zakat. Malah, dek kerana tidak mampu lagi menjalani kehidupan yang mewah, berlakulah pergaduhan suami isteri yang akhirnya membawa kepada perceraian.

Selaku manusia, kita memang tidak dapat melawan qada dan qadar Allah SWT. Namun jangan kita lupa, bahawa ada satu ibadah yang mampu menolak musibah daripada menimpa kita. Nabi Muhammad SAW menyatakan bahawa ibadah sedekah termasuk zakat, hakikatnya mampu mengelakkan musibah atau bala bencana daripada menimpa kita, sebagaimana hadis daripada Amru bin Auf Radiallahuanhu bahawa Rasulullah SAW bersabda:



إِنَّ صَدَقَةَ الْمَرْءِ الْمُسْلِمِ تَزِيدُ فِي الْعُمْرِ وَتَمْنَعُ مِيتَةَ السُّوءِ

"Sesungguhnya sedekah (termasuk zakat) seseorang muslim itu memanjangkan umur dan mencegah dari mati dalam keadaan buruk."

(Riwayat al-Tabarani).

Muslimin yang dirahmati Allah SWT,

Ketahuiilah bahawa Syaitan dan nafsu jahat amat membenci sifat pemurah, sehingga ia sentiasa berusaha mengajak kita agar selalu merasa was-was untuk memberi sedekah dan menunaikan zakat. Allah SWT berfirman dalam surah al-Baqarah ayat 268:

الشَّيْطَانُ يَعِدُكُمُ الْفَقْرَ وَيَأْمُرُكُم بِالْفَحْشَاءِ

"Syaitan itu menjanjikan (menakut-nakutkan) kamu dengan kemiskinan dan kepapaan (jika kamu bersedekah atau berzakat), dan ia menyuruh kamu melakukan perbuatan yang keji (bersifat bakhil kedekut)."

Sebenarnya, sedar atau tidak, sifat kedekut yang melekat kuat di hati itu yang menahan seseorang itu daripada memberi sedekah dan berzakat, hakikatnya tanpa sedar menjadi pemangkin kepada kebinasaan hartanya sendiri, seperti mana diingatkan oleh Abu Hurairah Radiallahuanhu bahawa Nabi Muhammad SAW bersabda:



مَا مِنْ يَوْمٍ يُصْبِحُ الْعِبَادُ فِيهِ إِلَّا مَلَكَانِ يَنْزِلَانِ فَيَقُولُ أَحَدُهُمَا "اللَّهُمَّ أَعْطِ مُنْفِقًا خَلْفًا، وَيَقُولُ الْآخَرُ اللَّهُمَّ أَعْطِ مُمْسِكًا تَلَفًا"

"Tidak ada hari yang mana para hamba itu berpagian padanya melainkan terdapat dua malaikat yang turun, lalu salah satu dari mereka berkata: "Ya Allah, berikanlah ganti kepada orang yang melakukan infaq (sedekah). Manakala malaikat kedua berkata: Ya Allah, berikanlah kebinasaan kepada orang yang menahan hartanya (dari sedekah)."

(Riwayat Al-Bukhari dan Muslim).

Ingatlah, Syaitan dan nafsu bakhil akan sentiasa berusaha menghasut kita agar merasa bimbang, jika mahu bersedekah dan berzakat maka kita akan menjadi miskin. Padahal, hakikat yang sebenarnya jika anak Adam itu bersedekah dan berzakat, maka itulah punca yang akan menyebabkan dia menjadi kaya. Maka, menahan diri daripada memberikan sedekah atau zakat hakikatnya akan membuka pintu dan jendela kepada kerosakan harta. Semakin ditahan, semakin luas punca kerosakannya. Seperti mana rosaknya kekayaan Qarun dan juga dirinya yang bakhil pada zaman Nabi Musa Alaihissalam dahulu.

Hadirin yang dirahmati Allah SWT,

Hakikatnya, menjadi seorang yang pemurah adalah suatu kebaikan yang perlu diusahakan, yang perlu disemai dan dibajai setiap hari. Sifat pemurah ini hakikatnya adalah sifat para nabi dan para sahabat. Oleh itu, dalam usaha menyemai budaya memberi dan berzakat inilah, Majlis Agama Islam Selangor (MAIS) dan anak-anak syarikatnya seperti



Lembaga Zakat Selangor (LZS), Perbadanan Wakaf Selangor (PWS) dan Yayasan Islam Darul Ehsan (YIDE), terus konsisten menyeru kepada umat Islam agar tidak khuatir memberikan zakat, berwakaf dan bersedekah demi manfaat seluruh umat Islam di negeri ini.

Ingatlah, berzakat, berwakaf dan bersedekah itu adalah jambatan ke syurga. Ia adalah proses melestarikan harta di dunia demi kesinambungan di akhirat. Orang yang enggan berzakat, berwakaf dan bersedekah semasa hidupnya akan menyesal di saat kematiannya menjelma. Ingatlah firman Allah SWT dalam surah al-Munafiqun ayat 10:

وَأَنْفِقُوا مِنْ مَّا رَزَقْنَاكُمْ مِنْ قَبْلِ أَنْ يَأْتِيَّ أَحَدَكُمُ الْمَوْتُ
فَيَقُولَ رَبِّ لَوْلَا أَخَّرْتَنِي إِلَىٰ أَجَلٍ قَرِيبٍ فَأَصَّدَّقَ وَأَكُنْ مِنَ
الصَّالِحِينَ ﴿١٠﴾

"Dan belanjakanlah (dermakanlah) sebahagian dari rezeki yang Kami berikan kepada kamu sebelum seseorang dari kamu sampai ajal maut kepadanya, (kalau tidak) maka dia (pada saat itu) akan merayu dengan katanya: 'Wahai Tuhanku! Alangkah baiknya kalau Engkau lambatkan kedatangan ajal matiku - ke suatu masa yang sedikit sahaja lagi, supaya aku dapat bersedekah dan dapat pula aku menjadi dari orang-orang yang soleh'."

Kaum muslimin yang dirahmati Allah SWT,

Mengakhiri khutbah kali ini, berikut adalah beberapa perkara yang boleh dijadikan pedoman:



1. Umat Islam hendaklah yakin dan percaya bahawa harta adalah milik Allah SWT dan bila-bila masa Allah SWT akan menarik balik nikmat yang diberika sekiranya tidak dizakatkan, diwakafkan dan disedekahkan.
2. Umat Islam janganlah jadikan harta kekayaan sebagai berhala yang disembah dan dipuja sehingga sanggup melakukan apa sahaja, menghalalkan yang haram dan mengharamkan yang halal.
3. Ingatlah bahawa Syaitan dan nafsu itu sentiasa menghasut anak-anak Adam agar menjadi kedekut dan bakhil dan menganggap bahawa harta itu boleh mengekalkan hidupnya di dunia.
4. Umat Islam hendaklah melaksanakan ibadah zakat menerusi Lembaga Zakat Selangor dengan mengunjungi kaunter-kaunter terdekat.

أَعُوذُ بِاللَّهِ مِنَ الشَّيْطَانِ الرَّجِيمِ
خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ إِنَّ
صَلَوَتَكَ سَكَنٌ لَهُمْ وَاللَّهُ سَمِيعٌ عَلِيمٌ ﴿١٠٣﴾

"Ambillah (sebahagian) dari harta mereka menjadi sedekah (zakat), supaya dengannya engkau membersihkan mereka (dari dosa) dan mensucikan mereka (dari akhlak yang buruk) dan doakanlah untuk mereka, kerana sesungguhnya doamu itu menjadi ketenteraman bagi mereka dan (ingatlah) Allah Maha Mendengar, lagi Maha Mengetahui."

(al-Taubah : 103).



بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ
بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ
تِلَاوَتَهُ، إِنَّهُ هُوَ السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ
وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَمَنْ تَبِعَهُمْ
بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا
اللَّهَ، أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Hadirin yang dirahmati Allah sekalian,

Marilah sama-sama kita bertakwa kepada Allah SWT dengan melakukan ketaatan kepada-Nya dan menjauhkan diri daripada perbuatan keji dan maksiat.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا
عَلَيْهِ وَسَلِّمُوا تَسْلِيمًا ﴿٥٦﴾
اَللّٰهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
أَجْمَعِينَ.



اَللّٰهُمَّ اغْفِرْ لِلْمُسْلِمِيْنَ وَالْمُسْلِمَاتِ وَالْمُؤْمِنِيْنَ وَالْمُؤْمِنَاتِ
الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُّجِيبُ الدَّعَوَاتِ
وَيَا قَاضِيَ الْحَاجَاتِ. اَللّٰهُمَّ اَعِزِّ الْإِسْلَامَ وَالْمُسْلِمِيْنَ،
وَأَهْلِكَ الْكُفْرَةَ وَالْمُبْتَدِعَةَ وَالْمُشْرِكِيْنَ.

اَللّٰهُمَّ اِنَّا نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِيْنِ، وَنَسْأَلُكَ
بِاسْمَائِكَ الْحُسْنٰى، وَصِفَاتِكَ الْعُظْمٰى، اَنْ تَحْفَظَ بَعِيْنَ
عِنَايَتِكَ الرَّبَّانِيَّةَ، وَبِحِفْظِ وَقَايَتِكَ الصَّمَدَانِيَّةَ، جَلَالَةَ
مَلِكِنَا الْمُعْظَمِ، سُلْطَانَ سَلَاطُوْر، سُلْطَانَ شَرَفُ الدِّيْنِ
ادريس شاه الحاج ابن المرحوم سُلْطَانَ صَلَاحُ الدِّيْنِ عبد
العزيز شاه الحاج. اَللّٰهُمَّ اَدِمِ الْعَوْنَ وَالْهِدَايَةَ وَالتَّوْفِيْقَ،
وَالصِّحَّةَ وَالسَّلَامَةَ مِنْكَ، لَوْلِيِّ عَهْدِ سَلَاطُوْر، تَغْكُوْ اَمِيْر
شَاهِ ابْنِ السُّلْطَانَ شَرَفُ الدِّيْنِ ادريس شاه الحاج، فِيْ
أَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ يَا ذَا الْجَلَالِ وَالْإِكْرَامِ.
اَللّٰهُمَّ أَطْلُ عُمْرَهُمَا مُصْلِحَيْنِ لِلْمُوظَّفِيْنَ وَالرَّعِيَّةِ وَالْبِلَادِ،
وَبَلِّغْ مَقَاصِدَهُمَا لِطَرِيْقِ الْهُدٰى وَالرَّشَادِ.

Ya Allah! Kurniakanlah petunjuk kepada kami untuk mendirikan solat fardu lima waktu secara berjemaah, menunaikan zakat melalui Lembaga



Zakat Selangor, mewakaf harta melalui Perbadanan Wakaf Selangor dan menginfakkan harta pada Tabung Infak Jariah Umat Islam Selangor (TIJARI) dan kepada anak-anak yatim melalui Yayasan Islam Darul Ehsan (YIDE).

Jadikanlah kami antara hamba-Mu yang menjaga amanah. Kuatkan iman kami agar menjauhi perbuatan khianat serta jauhkan kami termasuk dalam golongan yang mengabaikan tanggungjawab dan jauhi negeri dan negara kami daripada kehancuran disebabkan perbuatan rasuah. Serahkan tanggungjawab memimpin negara kami kepada hamba-Mu yang amanah dan jujur serta tegas lagi berani menegakkan kebenaran dan melaksanakan keadilan berlandaskan syariat. Jadikanlah Ya Allah masjid dan surau di Negeri Selangor rumah-rumah-Mu yang aman, mempersatukan dan menjadi nadi kekuatan ummah.

اَللّٰهُمَّ يَا دَافِعَ الْبَلَاءِ، اِدْفَعْ عَنَّا هَذَا الْوَبَاءَ وَالْبَلَاءَ وَالْمَرَضَ
وَالشَّدَائِدَ وَالْمِحْنَ، بِلُطْفِكَ يَا لَطِيفُ اِنَّكَ عَلَى كُلِّ شَيْءٍ
قَدِيرٌ وَبِالْاِجَابَةِ جَدِيرٌ.

رَبَّنَا هَبْ لَنَا مِنْ اَزْوَاجِنَا وَذُرِّيَّتِنَا قُرَّةَ اَعْيُنٍ وَّاجْعَلْنَا لِلْمُتَّقِينَ
اِمَامًا. رَبَّنَا ءَاتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ
النَّارِ ﴿٣٩﴾.



عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ
وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ



فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ نِعَمِهِ يَزِدْكُمْ،
وَاسْأَلُوهُ مِنْ فَضْلِهِ يُعْطِيكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ.